

國朝閨閣詩鈔

國朝閨閣詩鈔

第五冊

繫香詩草

晉寧

李含章

蘭貞

長離閣詩集

武進

王采薇

玉瑛

石蘭詩鈔

大興

胡慎儀

采齊

盈書閣遺稿

錢塘

袁棠

秋卿

采香樓詩草

吳縣

席蕙文

耘芝

吟香摘蠹集

德化

楊惺惺

柳枝

鶴語軒詩集

合肥

許燕珍 嚴瓊

兩面樓詩稿

吳縣

張芬 此紫蘩

蘭圃遺草

星子

胡佩芳 秀亭

青藜閣詩集

甘泉

江珠 碧岑

第五冊

卷一

李夫人含章字蘭貞雲南晉寧州人湖北巡撫
因培長女湖北布政使歸安葉佩蓀繼室廣西
巡撫紹奎山西布政使紹本之母著有繫香詩
草

繫香詩草

晉寧李含章蘭貞

秋夜露坐

火雲秋未收商氣夕乃至涼飈動木末梧葉蕭
蕭墜廣庭延佇久月影半在地銀河淡無波疎
林皎初霽軒南最幽曠竹露灑寒翠清陰下藤
蘿餘香冷荷芰披襟愛晚涼枯坐意忘睡夜久
鐘漏沉流螢在衣袂

哭次媳周星薇

好月不常滿好花不常紅賢婦豈易得少女占
乃凶方汝來嫁時婉嬾昭儀容上堂拜姑嫜鳴
玉聲璫瓏柔嘉叶娣姒溫惠孚奚僮汝德淑且
慎汝貌頎而豐去年春正月汝夫試南宮汝爲
檢行裝兩頰如丹楓告余昨病肺唾壺無時空
無乃近虛瘵百年恐不終謂是偶疾耳豈遂災
其躬如何未逾歲骨立成枯桐夫豈藥不靈抑

亦醫之庸病中索金環尙言須良工環成人不
見遽焉歸泉封窗前綠衣烏秋來斃金籠汝見
涕雙垂哀歌和清蛩怪汝言不祥謂汝情偶鍾
豈知是妖讖從此捐詩筒長沙二妃廟戢戢東
城東旅櫬依靈旗總帳懸霜鐘朔風記初列逝
將歸吳淞挈汝木蘭舟千里揚短篷江湖豈不
險故山多喬松哀詞一招魂燈火昏房櫳

黃陵廟懷古

君不見湘山高高湘水碧
淚痕染徧琅玕色
雲浪朝連青草浮
愁雲暮向蒼梧合
當年帝女下璇宮
滄洲曾聞禮秩隆
已傍松雲開貳室
旋看日月麗重瞳
鼓琴衣袵天家樂
星軒雙曜明珠幄
阿閣都繩素女絃
鈞天盡按皇姁曲
一從刻玉下南天
翠輦金輿不復還
漫比蟲沙沉漢水
還同弓劍慟橋山
一去成千古
九疑天遠留靈鎖
玉軼難乘元圃風
明璫空望涔陽浦
涔

陽江浦總魂銷更駕飛龍逐晚潮帝子揚靈江
上瑟夫君愁思洞庭簫瑟希簫歇人何在里俗
傳芭猶不改貝闕珠宮事渺茫蘭橈桂柂空烟
靄千秋哀怨起騷人懷古同傷遠別情薜荔秋
風山鬼泣鷓鴣暮雨客船聽竭來倚棹尋遺躅
古木蕭蕭階蘚綠廟火青熒鹿角磯寒潮嗚咽
巴陵郭屈賦成時書未焚書生臆論總紛紜願
將北渚江頭水一灑高唐峽裏雲

萬固寺

山寺不知路忽聞流水聲溪隨巖石轉塔與碧
雲平古木上無際幽禽時一鳴松根堪小憩試
汲石泉清

秦始皇

金虎宮幃事可憐漫疑鶉首賜鈞天終令六國
還三戶空使諸生笑九泉車載輶涼山有鬼舟
行縹緲海無仙傷心萬里長城在依舊扶蘇伏

劍年

陝州道中

車鈴響入暮煙中去路蒼茫接遠空
官樹陰迷鴻雁月長河怒捲鯉魚風
亂山積雪千層白古塔燒燈六面紅
異地不堪愁思積千家砧杵正匆匆

夏晝

午樓風暖試輕紗語燕聲中日未斜
滿地綠陰

簾不捲游絲飛上蜀葵花

第五冊

卷二

王恭人采薇字薇玉一字玉瑛江蘇武進縣人
知縣光燮第四女山東糧道陽湖孫星衍室工
書善畫著有長離閣詩集

長離閣詩集

武進王采薇玉瑛

與季迷夜起視月同作

虛扉浹宵開涼鐙照幽素肅肅鴉不翻團團雲
稍去蛩底聞行泉箐黑辨浮露外役于此捐中
疴自茲愈循階桂華歇交戶瓜蔓吐徒乖有懷
衷未協長往趣亦有同心人斯情積難訴

望夫石

妾顏初如花妾心已如石定情雙妍姿不忍君
歸見衰色妾顏將彫心不移妾身亦化君始知
冰爲肌草爲鬢山頭無人寄君信妾意淺君心
深恐君復化填海禽海禽來銜石方動不作巫
雲入君夢

春眠曲

篁梢壓戶簾紋細空色湖光著山膩鶯眠樹杪
弄垂絲蜨上花鬚醉芳氣琉璃隔香香暗流薇

帳夢醒聞輕鈎空闌盡日無人影日夕落紅蕚
不收

木蘭詞

生男勿喜歡生女勿悲酸女生當懸弧女足亦
莫雙行纏不見木蘭女代爺征可汗出門望行
塵日色青漫漫顧笑諸少年泣行何決瀾流塵
凝雙眉飛露綴兩肩閨中何能貴不及鐵衣錦
韉黃金鞍閨中何能豪不及銜霜度雪聽風湍

蛇矛丈人氣決前精感白日昏沙煙生還見天
子天子動色言腰金佩玉作織步綽約顧影驚
千官上堂拜父母父母疑重看開簾覓我故時
鏡手脫長劍分雙鬟君不見東家女兒好顏色
朝貧穿鍼暮貧織西家女兒衣盈箱自矜嫁得
金龜郎男兒封侯妾何有要取黃金自懸肘

夢天

碧闌十二花無數桂葉低籠若青霧蕊宮誰遣

別魂游只有青禽自來去波離扉薄不上關對
語月姊瓊樓閒銀河珊珊瀉聲小手弄白雲天
下曉

離居曲

露華網戶參差光碧筠粉薄如棲霜涼堂下簾
簾翠地素手無分玉如意燔膏作鐙澹不紅夕
撫綠綺空窗中一聲涼破楚天碧去雁叫影思
離鴻南山點苔愁向曉獨客瞳瞳涉長道樓前

月浪卷衣來夢裏江聲隔帷小

水宿

冥冥堤畔路草草別時家碧影沈湖月紅心上
豕花鐙微還下雁鐘冷不驚鴉薄醉和衣宿扁
舟入樹斜

九月十日舟由丹徒夜半與季迷乘月登
岸行三里作

幽行已三里邨落半關扉隻鳥時依樹孤螢不

上衣日斜人影瘦潮定櫓聲稀沿水星星火歸
驚宿鷺飛

三月三日

綠楊如霧拂窗斜病裏聞鶯正憶家吹夢夜風
先到樹弄愁寒雨不妨花蟲依香影垂簾網蛾
怯晨光墮帳紗我已離愁嬾春襖徑泥何處又
鳴車

春夕檢季述詩

百首新詩慰寂寥
微微燈坐夜迢迢
靈瓏鳥語驚簾押
寂寞香絲黯畫綃
一院露光團作雨
四山花影下如潮
憑欄罷檢緘愁句
恐損東陽病裏腰

蔣墅舟次和季述下第有作

一夕霜花涇鬢青
湍聲出渚棹初停
病中龍具和衣泣
愁裏魚簫帶夢聽
隔浦葉多飛似鳥
入林鐙小遠于星
從君湖海幽尋志
何日浮家去

杳冥

得季述書

尺幅吟牋照淚眸
半窗斜日夢孤舟
愁如天遠還窺帳
病與雲親不下樓
溼翠雨收侵硯匣
落紅風颭上簾鉤
青山到處應相憶
除是征人醉裏游

寄季述時客和州

空院題詩對碧莎
華年作別歎蹉跎
夢餘捲帳

人疑在書去尋愁語轉多曉岫入雲飛斷雁夜
鐙照雨落殘蛾空江無復憐才客此夕租船憶
嘯歌

山中偶作二首

夜松何濛濛月小飛不起知有抱瑟人垂光碧
簾底

露氣明曲巖花光照虛夜一片白雲聲飛泉隔
煙瀉

寄季述

嫩寒幃幙雨廉纖
衾上春衫逼曙添
試束晨妝拓幽閣
小紅齊見破梅尖

第五冊

卷三

胡女史慎儀字采齊一字觀止又字石蘭號鑑
湖散人直隸大興縣人元城教諭世繹女諸暨
諸生駱烜室著有石蘭詩鈔

石蘭詩鈔

大興胡慎儀采齊

自端溪入羚羊峽

西行過端溪放棹入谷口千峰疊迴環一水何
深瀏沿津三五家寥落依山阜巖石凌空虛相
對如配偶老坑生奇質鬼神日夕守鸛鵒眼難
逢蕉葉貴清厚造琢付詞人文光直射斗龍蛇
驚毫端煙雲潑墨後舉目眺兩崖苔鋪虎豹走

俯耳聆渚宮風激馮夷吼山川爽襟懷筆硯吾
良友對此融心神蕭然出塵垢孤鴻一聲來魑
地鄉心陡

舟行遇暴風雨

逆水行舟嫌道遠旅人悶對難消遣倏忽之間
風暴來遙望高山黑雲捲一霎船顛如簸揚舟
子篙亂如飛蝗隨流未辨泊何處嵐光雲氣紛
茫茫東西南北都不辨空中但聽走雷電聒耳

波濤夾雨聲杳冥變幻如流霰此時客懷心膽
寒新愁往事集眉端少年不解離鄉苦老大方
知行路難追思昔日深閨內玉肌綽約飄香佩
小鬟扶我傍花陰弓鞋怕溜苔痕翠寧知中歲
苦奔波烈日狂飈任折磨自憐顚顚風塵裏誰
唱紅顏無渡河坐久雲收風雨了餘霞遠帶尖
峰小低徊鷗鷺泛清流忘機只有無情鳥

嶺南道中

五觀十三人艱危仗此身經年淚洗面百感痛
傷神塞北無茅屋燕南有老親如何千樹雪不
是昔時春

歲暮

歲暮催寒景淒然自掩扉眼花看字小身瘦覺
衣肥異地人情薄家鄉魚雁稀一心無著處空
復憶庭闈

客途新柳

金縷珍珍舞態新
額黃初試正宜人
參差灞岸含朝露
掩映章臺報早春
青眼慵舒還是夢
修眉未展畫難真
風流綽約誰能似
張緒當年最得神

侍蔣太夫人滕王閣小宴

章城何幸遇仙儔
會向江樓紀勝遊
一片夕陽紅蓼岸
數聲漁笛白蘋秋
西山雨過煙光碧
南浦風翻雪浪浮
自媿暫依喬蔭下
敢同蘭桂占

先籌

惜花春起早

一番花信五更風那管春宵夢未終起傍芳叢
頻檢點夜來曾否損深紅

愛月夜眠遲

銀蟾朗澈有餘光靜坐庭軒寄興長地僻不知
更漏永瞥驚花影過東牆

掬水月在手

長空皎皎夜光寒倒浸清波影未殘偶近金盆
濯素手姮娥驚向掌中看

弄花香滿衣

小苑紅深綠未肥獨攀嬌蕊弄芳菲雙雙粉拍
穿花蝶何事隨人上下飛

第五冊

卷四

袁女史棠字雲扶一字秋卿浙江錢塘縣人貢
生健磐女知府樹妹儀徵諸生汪孟鋈室著有
繡餘吟盈書閣遺稿

盈書閣遺稿

錢塘袁 棠秋卿

古意

螢火出深樹蟋蟀鳴空堂
堂上雙棲燕秋來思
故鄉遊子何不歸道路阻且長
遙天促暮砧成
婦尺刀忙急急縫寒衣路途恐已涼

憶西湖

武林三月湖水平
桃花浪暖春風生
山光水色

淡無際別有天地寰宇清玲瓏飛閣連雲起疊
翠鋪紅濃淡裏坡公吟詠太多情欲把西湖比
西子此中風味我曾嘗可惜十年離故鄉故鄉
晝遠宵不遠昨夢泊船聞藕香

送香亭二兄之壽春

未定君行日儂愁先已深萬山搖落候孤客遠
遊心菊放重陽色詩添離合吟何堪情切處還
聽滿城砧

秋夜懷兄

寂寂秋聲思不禁
繡簾微動晚風侵
闌干影轉千家月
砧杵聲移兩地心
手足情懷煩悵望
詩書燈火費追尋
紅箋欲寄何由達
千里江南少雁音

送寶英大姊入蜀

萬里雲山是錦城
長亭此別淚盈盈
叮嚀莫負詩書約
宛轉難分姊妹情
岸柳恨牽離合夢
官

河愁聽可憐聲當筵且盡杯中酒相憶明朝路
幾程

寒食

禁煙時節冷如秋簾捲疎風入小樓滿地落花
初解夢一雙歸燕不知愁鶯啼細柳催寒食雲
送輕雷過陌頭拋卻繡鍼攜彩筆吟詩愛倚竹
闌幽

送春有感

留春不住奈春何飛絮飄紅委逝波巧舌烏如
鶯最少無名花著子偏多萍浮池館魚吹浪香
減醑醺燕出窠正是綠肥紅瘦日可憐青鬢暗
消磨

明妃

一曲琵琶淚未收犁眉騎上擁貂裘不將心負
天南月那得魂歸塞北秋青塚路迴雲漠漠紫
臺人去路悠悠細君小女應回首贏得千年碧

草愁

春閨雜詠四首

佳節清明又一年
梨花深苑斷腸天
東風微雨添惆悵
放下湘簾聽杜鵑

池上垂陰杏子青
一天微露漾疎星
梨花消瘦流鶯老
楊柳風來月滿庭

輕風翦翦柳絲絲
一徑花飛最上枝
昨夜新雷今夜雨
小闌干外筍參差

薄暮東風散晚晴
繡窗高映一燈清
祇因怕聽
鄰家笛不敢推簾看月明

夏夜對月

綠窗深鎖晚涼天
螢火初生出暮煙
卻喜小園
明月夜紅闌干下戲鞦韆

小園雜詠三首

數椽幽屋絕塵囂
無數庭花手自澆
也有不平
閨閣事海棠窗下讀離騷

簇簇新枝帶露開
輕陰低護小蒼苔
最憐紅藥初栽後
報說花神送雨來

碧葉成陰杏子紅
吟懷分得繡餘工
半簾花落憑風掃
一卷書殘午夢濃

第五冊

卷五

席女史蕙文字蘭枝一字耘芝江蘇吳縣人清
溪知縣紹元次女常熟諸生戴安室工詞賦及
駢體文著有采香樓詩草自怡集

采香樓詩集

吳縣席蕙文耘芝

夜坐

古砌咽草蟲幽人愛清景空林落疎葉淡月澄
秋影寂坐生微涼露滴芙蓉冷

懷沈妹蕙孫

夜雨洗遙山空翠淨如拭涼風襲羅衣卷簾愛
秋色言念素心人良晤不可得試采芙蓉花相

思渺何極

橫塘曲

芙蓉露滴秋水香
田田翠蓋映羅裳
蘭橈畫槳泛橫塘
風吹紅袖驚新涼
徘徊花底雙鴛鴦
欲采蓮子愁空房
愁空房心悄悄
目送斜陽波渺渺
郎情如月不長圓
妾貌如花不長好
含情折花暗斷腸
回首西風顏色老

將赴郡中留別鑊香

傲性交親薄知心獨有君堪憐旬日敘又擬隔
年分流水催歸棹青山悵暮雲相看兩行淚同
是惜離羣

武侯祠

森森古柏翠煙浮獨向祠堂謁武侯國定三分
成鼎足圖荒八陣咽江流天心何事終亡漢臣
節真能再造劉畫壁靈旗風雨黯夜深應挾鬼
神遊

杜陵草堂

萬里橋邊結伴遊
草堂景物倍清幽
斜陽衰草成荒徑
老樹寒鴉變暮秋
放棄半生悲患難
文章千古擅風流
先生遺址誰題句
憑弔頻教旅客愁

玩淩靜宜趙茗香贈詩感賦

繞座清芬洗俗塵
素牋留得墨痕新
縣縣遠道迷芳草
渺渺予懷望美人
一徑落花愁夜雨
數

聲啼鳥惜餘春相思空自勞魂夢卻恨宵來夢
未真

秋日偶成

疎林落葉響颼颼景物淒涼怯倚樓明月故人
千里夢關山新雁一聲秋獨憐荒徑猶開菊自
許閒情可伴鷗漫道讀書生計少居然坐擁抵
封侯

深院

曲徑深深繡幕垂綠窗斜日映紅薇輕風不動
鞦韆索香徑無人蝶自飛

過十二峯

哀猿嘯處樹重重雲鎖高唐舊楚宮人在夕陽
疎影外澹煙微雨過巴東

虎邱竹枝詞二首

平波如鏡漾輕漣正是山塘薄暮天競把花籃
簪茉莉隔簾拋與買花錢

樓臺照水影層層隔岸波光午夜燈小艇一聲
歌歛乃半湖明月采紅菱

得伯父書

惏然此日挹高風驛使梅花邂逅逢關塞萬重
家萬里尺書猶是去年封

第五冊

卷六

楊女史惺惺字柳枝江西德化縣人處士家震
次女諸生李成蹊室與姊匹鴛並工詩著有吟
香摘蠹集

吟香摘蠹集

德化楊惺惺柳枝

采桑吟

采桑城南隅春風吹我衣
攜筐循曲徑遠望綠陰肥
昨夜飼蠶蠶漸老今朝采桑葉稀少
蠶老應知繭易成葉稀翻覺春歸早
春歸蠶事難遲遲采桑伴侶知不知

暑月省親途中作

夏木濃陰合蟬聲聒耳聞郵亭何處憩縣界此
中分一徑入叢竹四山多怪雲奚囊懸馬首索
句誦南熏

萱草

我愛黃花好開從夏日繁宜男真合佩養性復
何言蠲忿過于酒忘憂種在盆北堂時一顧思
伯倚庭軒

春日入園小集

襖鞋三徑草芊絲日暖風和二月天姊妹彈棋
慵刺繡兒童挽架學鞦韆巾文薜荔牆頭繞一
字游絲屋角牽乘興看花貪起早何須秉燭夜
開筵

春社

春來五戊宴雞豚社散人歸日已昏亂落桃花
紅掩砌齊開柳葉綠環門水因換舊頻添雨酒
爲治醵勸舉尊日暮楓林聞擊鼓紛紛祈報遍

鄉村

秋夜偶成

月落參橫夜寂寥
撿書披讀過長宵
三秋冷氣侵蓮幕
一徑寒楓下板橋
露滴簷牙蛛網重
風迴樓角雁聲遙
殘缸剔盡愁無奈
起向珠欄弄玉簫

冬閨怨

人言冬夜長
妾愁冬夜短
如何睡到明
不得衾

溫暖

分種牡丹

餘杭帶得牡丹歸
栽向牆陰土力肥
怪底紅顏稱絕色
由來花好子應稀

同二兄萸生夜話

夜闌相對論名姬
觸撥愁心不自持
見說馮郎多薄倖
尊前怕讀小青詩

秋日卽景

捲簾愁緒一時生
冷雨疎風不放晴
燕子也知秋色老
向人如作別離聲

明妃

休把容顏怨畫師
漢宮應不少蛾眉
若教一例承恩寵
縱使傾城那得知

答鄰女

鹽米空嗟僨宿逋
書賣繡索誰沽
春風不度柴門裏
榆莢飄來半箇無

寄外

別時相囑每情深
頭白休教帶淚吟
妾比葵花君比日
由來朝暮只傾心

晚霽入園

密雨江城四望迷
對門寒瀑下山谿
幽軒一洗塵埃氣
但有飢鳥處處啼

竹枝詞

渡頭漁火一星星
郎販魚回過酒亭
醉倒袒衣

階石臥恐傷風露喚郎醒

第五冊

卷七

許女史燕珍字儼瓊一字靜舍安徽合肥縣人
龍溪知縣其倬第三女無爲州諸生汪鎮室工
詞賦及南北曲著有鶴語軒詩集荷餘小草

鶴語軒詩集

合肥許燕珍儼瓊

白紵舞

華堂玳瑁歡喧曉珠簾捲起流蘇綠雪兒噤管
紅兒簫碧玉桿撥黃金槽秉燭照耀千青霄天
名不夜忘昏朝花奴羯鼓聲疾敲美人擁出笑
蓉嬌小憐二八春風妖綠鬢彩袖盤翠貂璫瑜
卻立環蕩搖大垂小垂爭嫋嫋湘裙百折魂爲

銷香風宛轉蘭麝颺歌珠掩抑隨弓腰滿堂流
盼飛鴻招翩然舞罷丰態標恍疑姑射來塵鬢
四筵讚語呶且叨纏頭一霎堆紅綃樽罍不盡
神不饒起視脈脈冰蟾高

烏夜啼

露華洗天明月孤庭柯夜夜啼栖烏秋深霜冷
氣如水空房少婦心踟躕良人重利離鄉故腸
斷迢遙無尺素當戶唧唧織寒衣寒衣織成寄

難去幾回無語空淚垂烏啼啞啞增人悲

春江花月夜辭

金陵月碧如玉團圓夜照春江曲後庭歌闌烟
塵生不見花紅見草綠楊家阿摩居九重繁華
卻逐迷樓中翡翠珠被美人語玉容可惜呼崆
峒踏土不如踏浪好軸轡十丈錦帆繞零星兩
岸珠鈿明綠楊影裡風嫋嫋廿四橋頭歌管徹
無雙亭上飄香雪蒼龍飛天喚不迴六宮離離

土花碧豔簇香圍
悲一瞬長夜茫然憐孤影
後主荒宮杜宇啼
莫啣獨泣胭脂井

晚晴

小院初晴後
鉤簾四望賒白雲
殘雨散青草
夕陽斜花媚
迷新蝶林高噪
晚鴉最憐幽絕處
鼓吹聽鳴蛙

不寐

香燼金猊冷
燈昏欲二更
雲天孤鴈影
霜月半

簾旌木落秋聲勁
衾單夜氣盈
柔腸愁百結
併作一宵情

桂花

霓裳舞罷月輪圓
冷露無聲秋正妍
雲影千層浮綺閣
天香萬斛落華筵
移來金粟應非幻
栽向蟾宮卽是仙
我欲驂鸞吹玉笛
乘風飛過畫樓前

初夏書懷

一縷香浮畫閣東
疎牕面面捲簾櫳
雨殘槐蔭
迎人綠風亞榴花
潑眼紅貧澀
孟郊詩未減
居閒潘岳賦猶工
閉門情性原違俗
問取深閨孰與同

春閨

無語立階下
低頭弄素衣
怪他花上蝶
偏作一雙飛

有懷

月明簾影欲黃昏
香燼慵添半掩門
落葉滿庭聞鴈過
有愁那許不銷魂

第五冊

卷八

張宜人芬字紫蘩一字月樓江蘇吳縣人雲南
學政學庠孫女舉人曾彙次女直隸同知夏清
和室與姊蘊從姊滋蘭並擅詩名著有兩面樓
詩稿

兩面樓詩稿

吳縣張 芬紫紫

擬唐人秋宮曲

壺漏遲遲秋夜長
芙蓉帳底生微涼
分明夢入昭陽院
怪底君王不能見
沈吟推枕顰蛾眉
玉窗獨倚雙淚垂
窗前梧桐葉漸凋
月華淡淡風蕭蕭

端午村居

荒村無競渡極目野煙昏欲奠盈樽酒空悲繞
膝恩五絲難續命一賦獨招魂何以酬佳節
蒲綠映門

輓燕

越海還山願已違隔簾嬌語是耶非好憑釵影
傳遺照獨伴花魂葬石磯一壘香泥問畫棟幾
宵春夢別烏衣可憐吟客斜陽裏淚墨盈箋招
不歸

秋葉和清溪姊韻

幾樹鰐脂散遠空一番惆悵賦飄蓬閒情何必
隨流水秋思無端任晚風梧影漸消明月下蟬
聲猶在冷煙中攀條遙憶尋芳日綠葉成陰又
不同

讀史

從風飛檄布先聲百二秦關駐馬平謀士只能
籌借箸敵人寧不笑分羹欲知盛業兼王霸好

撫殘碑數甲兵讀罷龍門悲賈誼一樽爲弔兩
儒生

秋露

香凝桂影寒風漾荷珠墜滴逼斷腸花疑是悲
秋淚

擬唐人宮詞二首

戲擲榆錢喚小奴擬描春醉作新圖宮花御柳
爭芳豔那信長門雨露無

華清浴罷不勝嬌舞態翩翩試碧綃昨夜采蓮
歌宛轉君王親和鳳凰簫

七夕詠

晚涼無復舊時妝欲罷金梭益自傷莫笑離多
偏易別久將離別作尋常

和皎如沈妹見懷原韻

香銷紅袖晚妝殘月下懷人倚曲欄想得吟情
幽絕處滿庭風露玉釵寒

詠卓文君

錦江山色斂眉痕棄擲由人早斷恩何必白頭
吟寄怨夫君自解賦長門

洞庭竹枝詞二首

館娃宮畔多芳草消夏灣頭是妾家春色滿山
留不得任他流水送桃花

日斷浮梁路幾重可憐家傍最高峯如何一箇
團樂月半照行人半照儂

荷花蕩竹枝詞

殘葉離披滿渡橫
網師園外散秋聲
鴛鴦飛去絲難斷
怪底蓮心似妾心

第五冊

卷九

胡女史佩芳字秀亭號紉秋居士江西星子縣人廣西知府南藩孫女德安諸生燕位特室著有蘭圃遺草

蘭圃遺草

星子胡佩芳秀亭

芙蓉曲

芙蓉花發秋江渺
翠袖佳人對清曉
愛看花是拒霜姿
不比三春零落草
頻將妾貌比新花
應如邢尹相咨嗟
把酒問花花不語
漁舟撐出平灘沙
欲采芙蓉隔江水
鯉魚風吹羅帶起

秋夜

嫩涼新雨後空際白雲輕蛩訴他鄉事孤燈獨
坐情齋虛風戀竹簷靜月侵楹老氣誰能敵高
從碧漢橫

返照

古壁翻殘照蒼茫下翠岑光歆花影淡色逐澗
流沈送火回星野隨雲入晚林牧童遙指處新
月滿江心

初冬雨霽

入冬苦向雨中過今日欣逢旭景和
簾捲晴雲新雪少窗橫絳色暮霞多
深林鳥出翻紅葉淺水魚藏現碧波
不審嶺梅開也未喜無寒霧障瓊柯

初夏村居

綠暗紅稀晝景遲秧鍼輭弱向風欹
隴頭客慶三春雨茶市人忙四月時
熟麥飄香盈廣陌嫩萍鋪翠漲橫陂
茅簷竹舍誰來往日聽新鶯上

柳枝

山居

竹逕紆回任息遊
數間茅屋結峰頭
林招野雀呢喃語
石吐清泉曲直流
四月猶寒春事晚
小年是日客心休
去來雲影添幽興
何事身居百尺樓

楓

清寒十月見芳叢
點破嵐光上錦楓
兩岸餘霞

秋草外一林冷
談夕陽中儘教青女斑
頻染不讓天桃色獨紅
莫道吳江霜氣肅醉顏
原自奪天工

馬嵬

赫赫唐天子無能庇婦人
私盟星月語空付馬嵬塵

月下看雪

娟娟月半規下照庭隅
雪清況有誰知梅花堪

與說

月

風敲鐵馬響層簷
碧漢雲閒放玉蟾
皎潔寒光秋色靜
絲絲斜逗水晶簾

紅梅

設色寒朝意倍工
春前鬪豔放輕紅
佳人錯認桃花影
忘却貞姿冠臘中

寄諸弟

賈逵自讀舊時書然否他鄉也憶余記得庭前
親手植紫荊一樹近何如

第五冊

卷十

江女史珠字碧岑號小維摩江蘇甘泉縣人監
生藩妹諸生吾學海室工詞賦尤長駢體文通
經史並善舞劍著有青藜閣詩文集小維摩集

青藜閣詩集

甘泉江 珠碧岑

白雲泉

入山路盤紆結搆容膝屋此中秋色佳檻外雲
相逐看山務看骨方識真面目山谷清且空泉
乳滿山腹涓滴石竇閒注以雲根竹聽之洗人
心泠然奏琴筑咒鉢乳花浮無倩鳥爭啄斯僧
定何許坐消此奇福老樹不礙雲危石約可束

登嶺試一呼千峯應空谷歸來失清景是夢良
難續

讀硯雲同學詩稿題此寄慰

新詩品寒梅味之有餘清一卷冰雪文字與血
淚并傷哉陶婦歌夜半猿哀鳴子身茹荼蘼無
乃悲獨生嗟哉硯雲子斯恨曷能止清風播彤
管境苦才轉美觀身如皓月觀心如止水好去
參禪宗了悟無生指

千尺雪

四山如沃浮濃碧攀籐徑滑苔衣積褰裳拾級
境愈奇嶺上白雲如可摘雷聲隱隱亂石搖水
光一片垂簾白奔泉洶湧勢莫當迸裂雲根激
破石清泉入口冷齒牙層崖飛雪深千尺老樹
衝折自不死瘦蛟詰曲盤岩隙生平自是愛山
居從今愈痼煙霞癖

南樓玩月

葡萄獨酌登南樓數聲歸雁投沙洲玉盤忽從
海底出四山倒入寒江流分明是水不是月一
氣浩渺長空浮森森瑤林五百丈一枝吹作人
間秋我歌我舞懷詩仙捉冰影兮握流泉登雲
梯兮呼姮娥化作蟾蜍奈爾何

謁靜菴上人何亭

栽竹自成林捫蘿一徑深柴門教犬護破衲任
雲侵洗石開生面觀魚養道心烹茶留小坐聊

以滌塵襟

次清溪女史春日閒居元韻

花木深三徑神幽境亦虛
研經探至理考古嗜
奇書清夢鶯啼破殘梅
鳥啄餘謝家風韻好晏
坐賦閒居

落花次王平泉韻

促歡且覆掌中杯浪蘂飄
花瞬作堆滿苑綠陰
人賦別一簾紅雨燕歸
來唾成紺碧衣初染泣

化瓊瑰夢不同費盡春工殊莫辨究因誰落爲
誰開

題王子乘所藏惜花圖三首

努力春風好護持小桃紅欲破顏時西天稱意
花誰似消受香嚴只一枝

鬢雲縹緲翠鬟低未許樓紅逐絮泥認取雙鉤
檀暈處一彎新月度花西

寫月摹雲費翦裁睡成紺碧泣成瑰生嫌黷面

誇紅白不放天花墮劫灰

青藜閣詩集

鄭煥別館藏書

戊五十二